

# Paulsh GALATIA kuhtée akchiwakíialaxuahcheesh ala kuss baawaalaátdeehcheesh hinné koók.

---

Hinna baa baalaáche bassáachiahte hinné koók.

**1** Paul huuash bíik. Hinna baa baalaáche díiluss déewahkuuk. Jesus Christ bacheéom alapátcheesh bii hawáhcheesh ko dii chichéhchewahchewiawuuk. Bilaxpáake alaxuáhchelak kon bii pátchissuuk. Bilaxpáakdak kon bii báasak bii déehchessaak. Baaleettaa Ischawúuan Dakkaasúua bale shée koon Iilápxe Akbaatatdía chiléhcheesh kon bii báasak kon bii déehkaak alapáttuuash bii achíhkuuk.

<sup>2</sup>Hilihtée akchiwakíiwakupuuash an baawalaáche éhkaak iixaxúa “Itchik.” huuk. Eek awé Galatia huuash kuhtée Jesus Christ akkusschiwakíialaxuahcheesh hinné baawalaátak díilussee “Shóotaachi?” buuk.

<sup>3</sup>Hilísh Baksáau Akbaatatdía dak Baxxiilaatúuash Jesus Christ dii íchishikaasak dii daásdeekaasuulak ko ii bahchiwakáak baakoon ítche dii daachíhkuulak baliachik.

<sup>4</sup>Ischawúuan Dakkaasúua Baksáau Akbaatatdía al ilíia díash ko ii ílaa baa kxawíianniawuuash ii saawilikkuúk. Bilaxpáake Akbaatatdía alaaxtúuash ammaa an díoo dak an baa dasshihtúua dak batshúook. Heehtaa Jesus saawilikkuúuash baa ala kxawíia koon ii balee kulustawilikkuúk. <sup>5</sup>Haak

Akbaatatdía dáashe báaxxiwaawakaaush ii baa koochihtalaatdák ko ii bahchiwakíik. Hilísh kootíih.

**Baleiichiweeítcheesh hawátkaatak iháaleetak.**

<sup>6</sup>Kuk kala hilaa dii awíhchish baalaáhak iháass bii baashihtéelem Akbaatatdía kak alíhchish daléewialuuk. Akbaatatdía Christ chúuss baa hilák dii dáasaasak baa al ítcheesh ko dii aalíwiook. Hilaakée bale iichiweé iháaum bale bísssheesh bacheéom “Christ is baaaliichiweeítchee koók.” helitdeleloosh ko kuss dískussaak díiluh dáhkalattuuk. Ammaa an díaluua ii bii daáxawiikaashduuk. <sup>7</sup>Jesus al iichiweésh baa ala koottáhileesh koók. Baleiichiweeítcheesh ihée hámnéetak. Iwak ii sheewéesh bilaxpáakuum baleiichiweeítcheesh helitdeleloosh ala chiweéihaattaak ammaa ala shífo áxpíhkaak ii dii baa hawátduuwiiliik ii dii baa bach ílapeeok. <sup>8</sup>Heem baleiichiweeítcheesh ii díluss baláaum dáhkalattuuash dúushiissalah. Eehkoon sapéelaht bíilu xuh bilaxpáakiexpawisheem koó xuh huuák hileén kal an baa dii baachiwaáush kulussáak iháatchelak kal ihchi xawíiam kuk kal Akbaatatdía bilée isée héelass déehchelak ko baakaalík. <sup>9</sup>Hinné hilaa dii baachiwaáhuuash kala chii sheewáawiik. Baleiichiweeítcheesh dii baachiwaáush kan díikukkak dáhkalattuuk. Dúushiissalah. Eehkoon kal íltaa sapéelaht baa dii chiwaáu iháatchewioolak Akbaatatdía baawakáak ko bilaxpáake baa haawéewahchewihmaachik.

<sup>10</sup>(Kal íwahkootak ammaa ala sheewéesh ii baa xíassaawahkaak bilaxpáakeem ko daásitchiwaalak ii baa ala sheewée dak baa an díawee dak ko ii bii sapéelak baliachissaak. Ammaa díaweesh Akbaatatdía ko kuttách díawaawakum ko ii daásitchiwaalak baliachik. Baaleettaa ammaa díaweesh bilaxpáake ii bii isíitchiioolak it baliatdak Christ ammaa díawaawakoosh akúkussahkee aawaássaawihmaachik.)

**Hilíatam kalako ii Paulsh bacheeiixpíluupe hawák.**

<sup>11</sup>Ikaalah bakúpkaateen. Hinna baa dii baachiweewiáwuush éhchekaasak kalaaxtássaalah. Hinna baleiichiweeítchim ii dii awáxp bíichiwaáush bilaxpáakan díassuuk. <sup>12</sup>Baaleetak bik éehkoon bilaxpáakdak kon bii

éhchekhchessaak. Haak kúh éhkoon bilaxpáakdak bii baachimmíhchessaak. Jesus Christ koók ak baatát bíssee baa xíassaahcheesh.

<sup>13</sup>Íisko an bii bilaxpáakeesh an dii chiwaáush kuk kala koók. Jews kooté ala chiwakáaush koótbaak díawaakaashik. Haak “Akbaatatdía ak kuss chiwakíikaatcheesh cheesúuk.” baliachissaa baailíshekaashbaak baa haawitáahinmaawiawaawaalichik. <sup>14</sup>Deéla Jews ala chiwakáaush akúkussahkee aawaám an baa díawee bii al íkuxxate ammaa hilúua íischiisaa bii koolák. Haak bas baaxaalíoo ammaa balee baálilaash an bilaxpáakuua ammaa chikittúuash kootá dak ko ii bihchi baailíshekaashbaak.

<sup>15</sup>Heehtaa bii anníihiissaahaa basahké dáakisshe koon kal an bii al apaahnéesh kukaakan Akbaatatdía an bii daásdeekaashbakoosh ko ii bii dáasaasak bii ílíik.

<sup>16</sup>Daasalakootéesh dáakbacheesh bii éhchekhaak Jews ak kootássee héeleen dáakbacheesh is baa al iichiweéitche baachiweelák hiliachik. Koolaléesh “bale iichiweéitcheesh huaa sáapa xuh” baak baák bahchiwáxxussaak. <sup>17</sup>Baaleetak koolaléesh awaasúualaho Jerusalem kuss baaléessaak bii íischiisaa Jesus alapátcheesh awáxp biichiweewiáwaassaak. Itchihk kootáa awé Arabia huuash ko kuss baaléek. Haak kalakoon awaasúualahum Damascus huuash kuss bahchishíik.

<sup>18</sup>Akbaatatdía koóm dáakbachee bii íkaahcheesh kan báalee dáawiiliche dasshipík. Heem kala hilaa Jerusalem kuss baaléek. Cephas huuash ko awákaawiawaak ii baaléek. Heem bii koolé baapé axpíchiaxxukaatak. <sup>19</sup>Deéla hinna bii kooléesh Baxxiilaatúuash akúpe James kuttách awákaak ihée alapátcheesh awákaaleetak. <sup>20</sup>(Hinna díiluss baawalaátuua ammaa sheewée koottáahilim Akbaatatdía éhchek. Bii bísshissaak.) <sup>21</sup>Jerusalem baaléela kalakoon awúum Syria huuash dak Cilicia huuash dak kuss baaléek. <sup>22</sup>Koolalée awé Judea huaa kuhtée akchiwakíialaxuahkaheesh bii iikukkúuwishihtaa it bii íkuuleetam bii shóotkaashdak bii alaaxtúuk. <sup>23</sup>Heehtaa hinné bii ala kooté ii iichiwaám iikukkaáhaaahkuuk. Baawakússeen hiliashiio xíassaak “Bacheém akchiwakíia balee baailíshekaassaak balee haawéewiash koóm baleiichiweéitchim bahkaláttuuash

bilaxpáake ko ii chiwaalatchík.” huuk. <sup>24</sup>Kal íwahkootak. Heem hilaakée bii ala kootéesh ii Akbaatatdíash dáshe báaxxiok.

### Paulsh dak hawéesee Jesus ala pátcheesh dak

**2** Heem báalee axpíshoopam dasshipím hilaa Barnabas awáxpak Jerusalem kuss bahchishshíik. Titus huuash kúh aawaaléek. <sup>2-3</sup>Ala koottáhile kal ii baaléesh Akbaatatdía bíss hilíashéek. “Kuss daléelak koók.” hem koótbaak. Heem ko baalák James dak Cephas dak John dak deéla hawéesee akchiwakáauwacheeitche dak awákaak. (Ak dii baálilaa hilaa díiluss duúosh koóuhtaa hileen bachéesh chikitcheekaásuuk.) Hileen bachéesh awáxpak bittátbaak kalakoon íluttach baachiweék baleiichiweéitcheesh Jews kootásseesh kuss al ii baachimmíwahkaawaalicheesh. Kooták ii koótbee ammaa díaweesh dak ísakkussee ammaa díawaawiawee dak baa annawitáahinmaam ko éhchewahchewiawaak. Kúh ittákkaataahilia ii bihchi baassihchíwaawiawaassaak. Shóohtaa shóotdak hinna awáxpe Titus Greek kootéesh áaxxaapashkuuash kuk díassaahaa alíatdeetahkuuk. Kooták. Ko ii íluttataattaa koótbee <sup>4</sup>hawátuum balee atkaáshdeetdelelaak bilaxpáake ham kon déehkuum balee héele koolúuk. Hilíashiiok. “Christ Jesus dáhkalattuuash ko kuttátduulak baa balappahkúuleetak.” haak ko balee kalátchehchewiok. Heem Christ Jesus an bahkaláttuuash kalako ii baleilíiaakaxpissuum bilaxpáakan díoosh kan balee isaawiaxsélasseesh ii ammaa ala sheewée ko ehkaáhmiook. <sup>5</sup>Heehaa baa ialitdáhtaa biikukkuwiáwaalichissaa iichúuwekaasuuk. Kooták. Ii koótbuua hinna baleiichiweéitcheesh ala koottáhileesh bale bísshe ii annaachíssachihchessuulak baliatuuk. Ii koótbuua hinna baleiichiweéitcheesh ala koottáhile ko bahkulusáawalakuulak díiluh díikukkak élahkuulak baliatuuk. <sup>6</sup>Deéla hileen akchiwakáauwacheeitcheesh biixaxúa bahchikittúuash iak Jews kootásseesh ammaa baachimmíwahcheesh kulusshíissaak áxpihchessuuk. (Akbaatatdía kuk bilaxpáake xaxúa bach kuxxáhchem hileen akchiwakáauwacheeitcheesh koóuhtaa bakúteen bii baheelélichissaa.) <sup>7</sup>Baaleettaa Akbaatatdía bii báasak bii baa aláachkis déehkaak hileen Jews kootásseesh

baleiichiweeítcheesh ii kon bii kuss ilíhchem ehkaáhuuk. Heem Petersh kúh kala kooták Akbaatatdía báasak Jews ii kuss ilíhchek. <sup>8</sup>(Kooták Akbaatatdía baa héeleen Petersh páttak an baatcháacheesh kuuák Jews baleiichiweeítcheesh chiweéhchek. Heem bíh kala kooták bíim baa héeleen bii páttak Jews kootásseesh bii chiweéhchek.) <sup>9</sup>Deéla shóon James dak Cephas dak John akchiwakíiwacheeitchikaasheesh koóush Akbaatatdía ammaa bakóosh kal éhkuulak Barnabas dak biilápte balee ischiáxachiik. Heem ii kootúua bach ilíia bahkaláttuum Akbaatatdía hileen Jews kootásseesh balee áxp baa hilíhkaak íiluh Jews kooté áxp baa hilíhchek. <sup>10</sup>Baa hawátkaatam balee koochéehkuuk. “Jerusalem koon balee héeleen baa baatcheeshkáateesh chichéhkaawilikkuuak chiwakáakuuak kuxsakuuakáalah.” huum kala koók. Kalako koótbaawaalichik. Heem an bahkuxshé kuss biiwaachíssaik.

#### **Antioch kuhtée koon Paulsh Petersh aliláshik.**

<sup>11-14</sup>Kal íwahkootam kalakoon awaasúualaho Antioch bii koolám Cephas húula hiiák kuhtée baakoon ik hileen Jews kootásseesh akchiwakíiwakupuuu áxp baa duusák dahkúk. Heehaa bacheéom James ak áxp baa hiléesh Jerusalem kukaa Antioch kuss duúok. Kala kuhtée díiolak Jews kooté akchiwakáaum baleilíiaakaxpissee ak aáchiweesh Cephas ko alaxaxík. Heem kal alíass shikkúalaak hileen Jews kootásseesh áxp baa duushíssaak. Hinna ammaa an día iháatcheesh xíassaakaashik. Iwahkoocheem kalakoon hileen Jews kooté ak Antioch bilaxpáakeesh akchiwakíiwakupuuuash kúh kootúuk. Al ihchi dutchalaaxtáaum baa písshe daáhuuk. Kalako ii Barnabas koóhtaa heelem kúh koochéek. Heem baleiichiweeítcheesh ala koottáhileesh kal aáchiwissuuash awakaáhik. Heem kootáa Cephas baa al iháatdiash akchiwakíiash ishóotuan ii anmaláshik. Koochéessuulak baliachik. Heem akchiwakíiash iixaxúa éhkuulak baliatak al iikukkúuan Cephas kuss hilíasheewaak. “Dii Jew kooták. Heehaa hilaakée Jews kootássee ala xatáaush ko kan dii kala kooták baleilíiaakaxpissuuash Jews kootéesh ammaa kaláttuuash dik baa ialeetdáht hinné áhte díalaaleettaahilik. Sáapii hileen Jews kootásseesh Jews ala kootúua kuk koótdahchewialaa? Iwak kuk baa chichéelichíssaak.” baak.

**Jews kootéesh dak kootásseesh dak ala  
kaláttuuash ii iléohmaachik.**

15 Jews ak kootásseesh dílum baleilíiaakaxpisseesh alaáchiwissuuk. Bassée balee kootásaaik bíilu dak baksáau dak balee Jews kootdásheen. 16 Bilaxpáakeem hileen baleilíiaakaxpissuuash kuttát píishe daáulak Akbaatatdía baa annawéessuuk. Heehtaa bilaxpáakeem Christ Jesus ko kala kuttáche kaláttaak heelak kal ii baa annawéek. Iwak ewahkaáhuulak bíiluh Christ bahkaláttaak balee baa annawéelak baliachkaasuuk. Kooták Akbaatatdía hilíasheek. “Bilaxpáakshoolahtaa hileen baleilíiaakaxpissuua píishe dáak ii baa annámnewialak baaleetiihmaachik.” hek. 17 Deéla Christ dak balee hawátkaatak ii Akbaatatdía al íkee balee baa annawéem kalako ii bíiluh Jews baleilíiaakaxpisseesh awaáchiwuuu koómmuuk. Heelak baa ala kxawíanniawuu? Christ bilaxpáake píishko páachilaak baa kxawíihilihchewia? Baaleettáahilik. Baleilíiaakaxpissee aáchiwissuua baa ala kxawíihilissuuk. 18 Baleilíiaakaxpisseesh kan baa hámneetam ewahkaáhim ii baa baachimmíwahchek. Hinna íwahkootéesh kalako ii kootáa hilaakée “Baleilíiaakaxpisseesh kal ii bilaxpáake ilúuash koók.” baawiweesh bii ak baa kxawíihile ii xíassaaahmaachik. 19 Hilaakée ala kootéesh baleilíiaakaxpisseesh kon bii iléessaak. Baleilíiaakaxpisseesh ko ii éwahchek. Kalako ii baleilíiaakaxpisseesh kan bii ala hiilítdeetak. Akbaatatdía an baatcháacheesh ii díak ii bii iléem kala píishe baaléwiawaak. Akbaatatdía Ischawúuan Dakkaasúua dak balee hawátkaatahchem awáxpak baawatbakálee bii kuss dakkaasúulak ko kal kooták. 20 Heem hilaakée bik kan bii baa hámneetam Christ balasé awúualak. Heem hilaakée Akbaatatdía dáakbachee an bii bilaxpáake baatách xaxuatáhilia ko díawaawakak bahkalátchekaashik. Ak bii íchissheesh bii annaachísatak saawakóosh koóm ii koótbaak. 21 “Akbaatatdía kootáa balee anníihiissahtaa an balee daásdeekaashbilikkuuash baa hámneetak.” baassaak. Baaleetdak Jews kootéesh is baleilíiaakaxpissuuash kal ii balúulak Akbaatatdía al íkee ii balee baa annawák bakaáulak kootdák Ischawúuan Dakkaasúua ittákkaataahilia shéihmaachik.

**Baleilíiaakaxpissee koó xuh bale baa kalátche koó?**

**3** Hileen Galatians baa élahkuuleetdasheen Ischawúuan Dakkaasúua kala sáapii sheelák éehkoon kúmmaam baa axuawaalaátuua ko kala koótbaak dii íkaaitcheewahkaak íwahkootbeesh hilaakée sapéelak dii iháass aalaáuk. Ilílahkalattuuash kalako ii Jews is baleilíiaakaxpissuuash kalako alaáchimmialuuk. <sup>2</sup>Hinné kaka sheewée beéshiwéechik. Hinna baleiichiweeitchéesh díikukkuuwasseesh Akbaatatdía dáakbachee dáhkalattuuk. Kalako ii Baleiláaxbaaxpee dilúttuuk. Baleiláaxbaaxpee ii dilútchéesh hinna baleilíiaakaxpisseesh al iláaush díaluuash kussaak. <sup>3</sup>Kuk kala hinna baa díaluu chichéelichissaak. Koochihk áa Baleiláaxbaaxpee ii daláwuush ítchéesh kalakoon hilaakée akúss shílatak “Kal ammaa an díawee bílala ii bihchi baa annawitáahinmaawiawaalak kootíihmaachik.” diliatuuk. <sup>4</sup>Jesus Christ an dáhkalattuuash ii hileen baa al ahchúuss daláak an baalilísheesh “Koolíash kootalée an baawilísuuleetiish daachik.” diliatuu? Hilaakée kuk ii baa daassihkéeliilush daatak hileen baa ala chúuss daláaush baatcháachik. <sup>5</sup>Hinné kala chii ko ii dii chichéhchewahkuuk. Akbaatatdía koóm Iláaxbaaxpeesh dii áakuuan páaxxutaahilik. Haak dii héeluaan baa baatcháache díak. Baleilíiaakaxpisseesh díalalakaauash ko ii kootássaak. Baaleettaa baleiichiweeitchéesh díikukkak Akbaatatdía dáakbachee dáhkalattuuash ko ii kooták.

<sup>6</sup>Abraham ichíssaannee Jews bíiluk. Dassihkaáulak ala kootéesh íkaalah. Baawaalaáchim Baaxpéesh hilíashiiook. “Akbaatatdía kalátchek. Heem Akbaatatdía al íkee an bilaxpáake ítchikaatak baa annawík.” <sup>7</sup>Heem íwak kal ii élahcheliilush daachik. Akbaatatdía ak kalátchéesh Abraham ichíssaannee koottáhile koók. <sup>8</sup>Deéla Baawaalaáchim Baaxpéesh awúuan an baalaátuua hilíashiiook buh. “Akbaatatdía íschiisaataahilia hilíasheek. “Hileen Jews kootásseesh an bii kaláttuuash ii baa annámmahkaak ínmaawiik.” hek.” huuk. Hinna íwahkootéesh kalako ii Akbaatatdía koóm Abraham baa ítchim chiwaák hilíasheek. “Díim kalako ii awé kootáa bilaxpáake an baa áatchilakaauash díawaawakbiik.” hek. <sup>9</sup>Heem íwak hinné ii éwahkuuk.

Abraham Akbaatatdía kalátcheekaashim ko ii Akbaatatdía Abraham baa áatchilahkaalaachik. Heem kal íwahkootam bilaxpáake xaxúa Jews kooté dak Jews kootássee dak Akbaatatdía ak kalátcheesh kuttáchkaat kúh Abraham ala kooté kootíohmaachik. Kúh an baa áatchilakaaush díakuuk.

<sup>10</sup>Deéla hileen hawátuum “Baleilíiaakaxpisseesh al ilíash díawaalak Akbaatatdía al íkee bii baa annawéek.” ak hiliacheesh Akbaatatdía datchúshiihmaachik. Kooták kan baalaátak hilíashiiok. “Sapéelaht baleilíiaakaxpisseesh xaxúa kaláttaak díalaachissuulak Akbaatatdía datchútchushiihmaachik.” huuk. Heetaa bilaxpáakeem koochéewioolak baaleetiihmaachik. Hinna íwahkooteesh kalako ii bilée isée héelass déehcheilush ditchiláachik.

<sup>11</sup>Deéla Baawaalaáchim Baaxpéesh hilíashiiok. “Bilaxpáakeem an baa kalátcheesh ii Akbaatatdía kuss baa annawéelak kala hilaa ii iléehmaachik.” Heem kala xíassaahkaak hinna baleilíiaakaxpissuuash ammaa ala shííosh díalaak Akbaatatdía kusséesh ii baa annámnewialuulak baaleetak. <sup>12</sup>Kal íwahkootak. Heem baleilíiaakaxpisseesh dak Akbaatatdía an bahkaláttuua dak baa dúuppeek. Hinné ko ii éwahkuuk. Baawaalaáchim Baaxpéesh hilíashiiok. “Bilaxpáakeem hinna baleilíiaakaxpisseesh al iláau xaxuatáhilia díalaatdak koók.” <sup>13</sup>Heetaa bíiluan hinna baleilíiaakaxpisseesh ak dússhishe hawáttaalaht Akbaatatdía balee haawéewiak. Christ Jews balee kak íaschilak balee kuluschík. Hinna an balee haawéewioosh iilén baawatbakáleesh kussíiom balee annaachíssatak shéek. Iwak ii sheewée Baawaalaáchim Baaxpéesh hilíashiiok. “Kala sapéelaht balapáttuum kuss daxtúulak Akbaatatdía sheekaalm ko ii kooták.” <sup>14</sup>Kooták Akbaatatdía Abraham ala kuss ihchi baa ímmiteesh ko ii hileen Jews kootásseeesh baa áatchilahkaalaachiihmaachik. Christ Jesus balee kak íaschilak balee kuluschík. Kalako ii bahkaláttuulak Akbaatatdía bíiluss al ihchi baa ímmiteesh ko kala kootáhkaak Baleiláaxbaaxpee biilu bilikkuúihmaachik.

### **Akbaatatdía Abraham kuss al ihchi baa ímmiteesh**

<sup>15</sup>Akchiwakíiwakupeen hinna baaptatchée an balee bilaxpáake ammaa an díawuua hawáteem ii baa xíassaawahchewiik. Eehkoon bilaxpáakeem baa íkuchkak



dakkachíiolak kukkan ala kulussáauleetak ammaa áxpíhkuuleetak ala haawíioleetak. <sup>16</sup>Heem Akbaatatdía Abraham dak ichíssaaanneem dak ala kuss ihchi baa ímmiteesh ala sheé “dichíssaaannee hawátam” hek. “ahóom” hessaak. Haak hinna “hawátam” heesh Jesus ko kuhchek. <sup>17</sup>Hinné baa sheewáawiawee koók. Akbaatatdía Abraham ala kuss ihchi baa ímmiteem baam díakuuihmaachik. Deéla báalee pilakisáa shoopák alóole dáahmíiaa pilakám dasshipák kalakoon hileen baleilíiaakaxpissuuash hilaa kooták. Heem Akbaatatdía Abraham “dichíssaaannee hawátam” heesh it koolák ammaa ala shéesh it baa haawéessaak. <sup>18</sup>Iwak ii sheewéesh baaleetdak bilaxpáakeem baleilíiaakaxpisseesh al ilíiash díalal Akbaatatdía baa ítche ko ii kuulák Akbaatatdía “Hilíatbaawalakbiik.” heesh kan baa hámneetiirmaacheesh koók. Shóohtaa shóotdak Akbaatatdía Abraham ammaa an díakuuwíash díakuuk. Baleilíiaakaxpisseesh al aáchiweesh ko ii koochéessaak. “Díawaawalakbihmaachik.” hem ko ii díakuuk.

### hinna baleilíiaakaxpisseesh kal ii kooléesh

<sup>19</sup>Hinna baleilíiaakaxpisseesh sáapii koolá? Ii kooléesh balee Jews kootéesh baa ala kxawíianniawuuash éwahkuulak hiliachik. Kal íwahkootak koolé aa Abraham ichíssaaanneem hawátam Akbaatatdía húuhchewíash húuk. Hinna baleilíiaakaxpisseesh Akbaatatdía dakkachíiak bilaxpáakíaxpawísheesh ko óohkaak Akbaatatdía dak bilaxpáakeesh dak kuanméaxeen ak ilíiash Moses kuúhchelak íh bilaxpáakeesh kuuwíak. <sup>20</sup>Daachéetaa bilaxpáakee iilápuuam bach inníwioolak aliilúuleetat baa kuanméaxeen ak baa iláakuuat dútchiiluk. Akbaatatdía Moses al ii díash kooté koowahchek. Heehtaa daachéetaa Akbaatatdía ílaataahíia bilaxpáakeet kuss ilíiik. Abraham al inníiash kooté koowahchek.

<sup>21</sup>Baleilíiaakaxpisseesh haak deéla Akbaatatdía Abraham dak ichíssaaannaam dak ala kuss ihchi baa ímmiteesh bach iichúlessaataahíiohmaachik. Akbaatatdía al ii íhch ípúaleetak. Baaleetdak koolaléesh baleilíiaakaxpisseesh al ilíiash bilaxpáakeem koon kalátchelak ii bilaxpáakam ii baa koochihtalaachéesh ko ii kootdák ko baleilíiaakaxpisseesh

bilaxpáake Akbaatatdía ishóocheen ii baa annawíohmaachik. <sup>22</sup>Heehataa Baawaalaáchim Baaxpéesh hilíashiiook.

“Bilaxpáakkootaa ak baa kxawíihilak ihch áakaawachissuuk.” huuk. Hinna íwahkootesh kalako ii Akbaatatdía kan daásdiak bilaxpáake ammaa an díakuuwiash Jesus Christ ak kalátche xaxúa kuttát díakuuihmaachik. Heelak ak kalátcheesh kal ii baa annawúuk.

<sup>23</sup>Akbaatatdía al íkee baleilíiaakaxpisseesh ii Jews balee baa annawíssaahataa ii balee hawassíiak baa ala kxawíia ii balee aahíissaa aa baleiichiweéitcheesh bíilussee xíassaahkaak ko ii bahkaláttuulak hiliachik. <sup>24</sup>Heem baa saápassée baleilíiaakaxpisseesh ko ii balee iiwishíiak ko ii balee hawassíiakaa aa Christ bahkaláttuulak hiliachik. An bahkaláttuuash kuttách ii Akbaatatdía ishóocheen balee baa annawéek. <sup>25</sup>Heem hilaakée kan baleiichiweéitcheesh bíilun éwahkaak bahkaláttuulak baleilíiaakaxpisseesh kan balee isaawiaxséelassaak. <sup>26</sup>Jesus Christ dáhkalattaak aláxpak hawáteetduum hilaakée Jews kooté dak Jews kootássee dak díixaxua Akbaatatdía dáake díiluk. <sup>27</sup>Haak dii íkuxxache dii bilihpíhkaak Christ áxpak ii dii hawátkaatuuk. Christ ala kootéesh al alataawítcheesh kan daxúassaalaalak ii dii xíassuuk. <sup>28</sup>Heem Jesus dak dii hawátkaatuulak ko kala kooták. Jews kooté dak Jews kootásseeesh kan bach kuxxúuk. Haak dáacheesh kooté dak ak kootásseeesh kúh kan bach kuxxúuk. Deéla bacheé dak bía dak kúh kootúuk. Christ Jesus ii dii éhkuulak díixaxua kan dii bach hawátkaatuuk. <sup>29</sup>Iwahkootak. Díixaxua Christ is dáalache ko dii hawák ii Abraham ichíssaanneesh kan dii hawúuk. Heem Akbaatatdía Abraham ala kuss ihchi baa ímmiteesh dii kuhchisaák ko ii Akbaatatdía ihchi kusseé dii baa annawíiook.

**4** Baleilíiaakaxpissee it balee isaawiaxséelam daasanníaliassee baa ishkawáshe ko kan balee kala kootéesh hinné kala kootaachík. Kuhée bilaxpáakeem bale baa eé ala kuhchiseé ko ii balíwiik. Eehkoon baakáateem ammaa ala kuhchisaáish daacheesh ko eéhtaa it baa íám ihch alíinneetak. Heem dáacheehkuulak ko kala kooták. <sup>2</sup>Heem ak íassee dak ak hawassée dak ammaa ala shííosh ko díaik it baa íám. Heeht iilápxe baapalíkuxxahchewishim hiilák kala hilaa koowíihmaachik. <sup>3</sup>Heem bíiluh kan balee kala kooták.

Akbaatatdía dáakbachee it húuhchesseesh Jews baakáate ko kan balee kala kooták. Baleilíiaakaxpissuum awé áakeen ammaa ala koolé ii baa hawassíiosh balee písshe déehkaak an díilaachkissheesh balee díahkuuash ii balee dáacheehkuuk. <sup>4</sup>Heehtaa al íkuxxahcheesh kala híim Akbaatatdía dáakbacheesh awé kuss húuhchek. Heem isahkáwisak bilaxpáakak an balee ala kooté íh kooták. Deéla kúh hilíilak baleilíiaakaxpisseesh íhch isaawiaxséelahchek. <sup>5</sup>Akbaatatdía dáakbachee húuhkaak bíilu Jews kooté baleilíiaakaxpissaam balee isaawiaxséeleesh balee kak íaschilak balee kuluschilák hiliachik. Kalako ii Akbaatatdía balee dáakiiak balee baa kuhchisaáhcheihmaachik. <sup>6</sup>Heem Akbaatatdía koóm dáakbacheesh Iláaxbaaxpee déehkaak akchiwakíiash biixaxúa bilikkuúm baxúoo datcheepík. Heem Iláaxbaaxpee Christ ak kalátcheesh balee chúuss chiwakáak kal iiwaachíssaak dáasaasak “Axée” heik. Iwak Akbaatatdía dii dáakeesh kal ii xíassaak. <sup>7</sup>Kal íwahkootak kalako ii hilaakée kan dii dáacheessuuk. Baaleettaa Akbaatatdía dáakeesh díiluk. Heem Akbaatatdía ammaa an díash ii ammaa an díiluhchisaailush daacheesh díhkukuohmaachik.

**Paulsh Galatians kootéesh kuss daaséen daachík.**

<sup>8</sup>Baapammasshipúuash Akbaatatdía it dáalaaxtuum baa iháaum ko akbaatatdíalahkaak kuss dáhchiwakaak dáhkalatchelom ii díhchi daxtúua ko kala kooták. Heeht kootéesh Akbaatatdía kussaak. Bilaxpáake kooté kuss chiwakíissaailush daachik. <sup>9</sup>Kooták baapím Akbaatatdía an dáhkalatcheleetahtaa hilaakéesh kal élahkuuk. Ta xuh “Akbaatatdía kala hilaa íhchi dii éhchehchek.” baawiiish daachik. Heehtaa hilaakée hileen Jews kootéesh an baa kaláttaak an baa hilák is baapammaasaxpilúua íassaalaak díalaaitchilaak Akbaatatdía al íkee ii díhchi baa annámnuulak diliatuuk. Kooták kala chii hileén awé áakeen bilaxpáake ammaa an díoosh dak ammaa íkuchkak huuash kooté díhch isaawiaxséennahchewialuuash hilíinnaak ii díhchi dáacheelahkuuk. Kuk baaxpáassaak ii dii baa annámnewialuulak baaleetiihmaachihilak sáapii kootáa ko kuss dáhchishhiwialaak ii baalilísuu? <sup>10</sup>Dii Jews kootássuuhata hileen baapammaasaxpilúuash Jews

kooté baaihkammáatuash ítchikaattaa baalíhkammaatak disítchiluuk baapaliinneetamméaxtatchee dak bilítaachiiatatchee dak awatatchée dak báalaatatchee. Dii bahkalátchelichissaataahiluuk. <sup>11</sup>Iwahkootak. Ammaa díaluua ítchilaassuum baachiláawalakuuk. Ammaa bihchi baailíshewaawalakuuash aaláa baa hámneetiihm baliachik.

<sup>12-14</sup>Bakúpkaateen Jews is baleilíiaakaxpissuaa bik awaáchiwissaak. Dii baa bakíishtewahkuuk. Hilaakée bii ala kootéesh díiluh koótdaalah. Bassée dii ala kootúuash an bihchi bulutché bíh koótbaak. Hinné dáhchichelahkuu? An dii bífo basséesh koolalée bii anneéwisak baawilísaak ko ii awé Galatia bii koolám baleiichiweeítcheesh ii dii awáxp biichiwaáuk. Haak “Sapéelak balee alaaxtám kuss awákaassuulak sáap.” daawialuulak kootítchikaatiihmaachihtaa koótdaassuuk. Baaleettaa bíssee ammaa iháatduuleetak bii díalaaitchikaashduuk. Haak ak xawáahnessuuk. Bii dilúpiassuuk. Itchihk kúmmaam bilaxpáakiaxpawishe koó xuh Christ Jesus iiaxúa díiluss huulák an díaluuash ítchikaashduulak ko kan bii kala koótduuk. <sup>15</sup>Hilaakée sáapii kan bii díalaakxawiiluu? Koolaléesh bii aláchissuuash kan dahkalaaxtáau? dalásuaa íttaak baatcháacheesh. Koolaléesh díshite baakaannák annúuwishdak diluskúak bii dakóolohmaachim balásduupassaak. <sup>16</sup>Hileen baa ala koottáahile dii baachiwaaáawahkuuash ii dii bulupíak dii iichúuwuuk diliatuu? Kalako ii bii díf koochíiluu? <sup>17</sup>Akian bilaxpáakuum isakkupéesh dii fassiiak dii balee iikukkúhchessaawiak dii kúalittaak baatcháachiiook. Heehtaa daasalakootúua ítchissaak éhkoon is dáalaatuash ko átduulak hiliatak ko ii dii iawaachéessiiok. <sup>18</sup>Bíh dii kúalitbaak dii bahchilaschitáahilak kootáa bik díiluss baawilíshek. Díawaataahilik. Bii éhkoolassaalahtaa an dii bahkuxshíwaachiinmakaauk. <sup>19</sup>Balaakkáateen an dii baawilíssuuash an balasé kxawíash kala chii bii aalaliíok. Ii baawilisaáhihtaa Christ al élahcheitchiluuash ko dii aawíwiawuuk. <sup>20</sup>Kala sáapeesh kalako ii hinna baleilíiaakaxpisseesh díhch isaawiaxséennahchewialuulak baalaaxták. Baaleetdak hilaakée dii awáxpak bii éhkoonnak ítchiihmaachik. Dii baachiweetaahiláak élahchekaashdak baliachik.

### Hagarsh dak Sarahsh dak ii baa éwahkuuash

<sup>21</sup> Baleilíiaakaxpissaam Moses bilikkúuash ak isaawiakséenneewioosh ammaa ala shéesh chilasshihchikaásaalah. <sup>22</sup> An baalaátuua hilíashiik. “Abraham dáakbachee iilápuulak hawátam isahké dáacheesh dáashe Hagar huuk. Haak hawáte isahké dáacheesseesh dáashe Sarah huum Abraham uá koók.” huuk. <sup>23</sup> Deéla hileen bíash hawáte Hagarsh Abraham híim dáakbacheewishik. Aaleéla Akbaatatdía ihchi baa ímmittiak Abraham ammaa an díakuuwiash kalako ii uá Sarahsh kúh kalakoon dáakbacheewishik. <sup>24-25</sup> Hinna íwahkooteesh ii baa xíassaakaashbaawiik. Akbaatatdía bale baa íkuchkitche dúupdiak. Heem hileen bíá iilápuuash kala kootúuk. Heelak Hagarsh kal ii baa xíasseesh bale baa íkuchkitcheesh baleilíiaakaxpissuum Moses bilikkúuash koók. Awé Arabia koon awaxaawím Sinai huuash kuhtée koon íwak Akbaatatdía Jews áxpak díash koók. (Bale dáashim Hagar huuash dak awaxaawéesh Sinai bach áppeelituuk.) Iwak bale baa íkuchkitcheesh kúh bilaxpáake ak isaawiakséeleesh xaxúa dáacheeak Hagarsh dáake ko kala kootúuk. Deéla awé áakeen Jerusalem Hagarsh dáacheesh ko kala kooták. Heem Jerusalem ak koolé baleilíiaakaxpisseesh isaawiakséelum it dáacheeom Hagarsh dáake ala kootúuash ko kala kootúuk. <sup>26</sup> Heehaa báakukko Jerusalem kuk uá Sarahsh kala kootúum ak kooléesh dáacheessuuk. Hinna Jerusalem baa sáapassee bíilussee basahkúua ala kootéesh ko kala kooták. <sup>27</sup> Baawaalaáchim Baaxpéesh awúuan baalaátak hilíashiik. “Hilaakée daláakdeetak dachílee dii fhchish déehaa baapiipíischiisaa daláake ahák dáalitdihmaachik. It déenneessaahaa díhchi dúuxaashissaa baalíhkammaatak díchilichih. Koottannák bíam chilée kon fhchish déeleteesh kuk dáake kooshtáak dik deé ahóoihmaachik.” huuk. <sup>28</sup> Biiluk bakúpkaateen Akbaatatdía Abraham ala kuss ihchi baa ímmiteesh ichíssaaannnee ahúhcheihmaacheesh koók. Isaac aksée Abraham dak uá Sarahsh dáacheesseesh dak koók. Christ Isaac ichíssaaannnee hawák. Christ dak balee hawátkaatak. Iwahkooteesh kalako ii Abraham

ichíssaanneesh bíiluh balee hawák. Akbaatatdía Abraham baam díakuuwiak heesh íwak koók. <sup>29</sup>Akbaatatdía Abraham ala kuss ihchi baa ímmiteesh Sarahsh dáakbachee ii bishíhtaa Hagarsh dáake kuk kootássaak. Koolaléesh Hagarsh dáakeesh hinna Sarahsh dáakbachee iichúulaak baailíshekaasshek. Hilaakée hileen baleilíiaakaxpisseesh ak isaawiakséeleesh kúh kan bíiluh Christ ak kalátcheesh balee iichúulaak baailíshekaassuuk. <sup>30</sup>Heehtaa Baawaalaáchim Baaxpéesh hilíashiiok buh. “Eek bíam dáacheesh dak dáake dak dísshialaah. Iilápxe ammaa éesh ammaa ala kúkdeetak eek hawátam isahké dáacheesseesh kal ak baa eéish daache koók.” Heem kúh Akbaatatdía baleilíiaakaxpisseesh ak ich isaawiakséelahche kuk kooté ammaa ala kuhchisaáleetchek. <sup>31</sup>Kal íwahkootam bakúpkaateen biiluk basahkúuash dáacheessaam baleilíiaakaxpisseesh isaawiakséenmewiawaassuulak kootíihmaachik. Baaleettaa Abraham uá ichíssaanneesh balee hawák. Heem bale baa íkuchkitchim Akbaatatdía Abraham ala kuss ihchi baa ímmiteesh ii kan balee baa áatchinnaachihchek.

**5** Christ baleilíiaakaxpisseesh kukaa balee kulustawilikkuuák hinna baam balee awáss daxchéesh kan bitáaxiiak. Heem baleilíiaakaxpisseesh isaawiakséenmewiawaassuulak kootíihmaachik. Heem ko koochihtíiaalah. Kala kuss chishíissaalah. Bassée baa ala kootásee kuss dáhchiwakaak hilaakée baleilíiaakaxpisseesh ii díhchi dáaxchiiluk. Kala koochéessaalah. An díluuosh chichúttalah. Baleiichiweéitcheesh kuttách kaláttaalah.

**Baleilíiaakaxpisseesh ii díhchi dáacheehchessaalah.**

<sup>2</sup>Diikukkaáhuukaweh. Paulsh bíim bii Jew kootáhtaa hinné kan dii baachiweéwiiluk. Dassihhchikaásaalah. Kan díishoolahtaa díhch áaxxaapashkulahchewialaalak Ischawúuan Dakkaasúua ammaa díalakoosh kan baa hámneettaahinnahkuuk. <sup>3</sup>Hilaakée íwak kaka sheewáataahinmiawaak. Bacheé shóolaht ich áaxxaapashkuchelak kukkan baleilíiaakaxpisseesh ammaa ala sheé xaxúa kalako díalak koók. <sup>4</sup>Akbaatatdía kal ílala an baa íkuchke kal ii bilaxpáake ítchikaatum dáhkalatchessuuk. Hilaakée “Baleilíiaakaxpisseesh ammaa

ala shéesh díaluuash ii Akbaatatdía al íkee díhchi baa annámnuuk.” diliataatdelelook. Baaleettaa Christ alíhchish dalaáum kan dílaa díhchi baa hínnaassuuk Akbaatatdía dii daásdeekaashdakbioohtaa. <sup>5</sup>Hinna íwahkooteesh ala koottáahile ii éwahcheesh Christ awáxpak balee hawátkaatam Akbaatatdía ishóoche bíolak balee baa annawitáahiliihmaachim Akbaatatdía íwahkoosheehmaachim éwahkaak kuss biiwaachíssaak awóoluuk. Iwak ii éwahkuuash Baleiláaxbaaxpee balee chiwaák “Koottáahilik.” hem deéla Christ kúh balee kúassaam baa biáwaawiwuulak kootám éwahchekaasuuk. <sup>6</sup>Deéla Christ Jesus balee hawátkaateesh bihch áaxxaapashkuwahkuu xuh baaleetdak Akbaatatdía dassihchíssaam éwahkuuk. Heehtaa Akbaatatdía an balee baa ískussaahche dáakbachee kan bahkalátchekaasuulak kala koók. Heelak kan balee áaxxee bilaxpáake awáchissak bahkuxshíwohmaachik.

<sup>7</sup>“Hinna baleiichiweéítcheesh baa ala koottáahileesh díikukkak dáhkalattaak kan daléitchiluuk.” baliachik. Sapéelak dii iháass aalaáum dii baa hawátduuwiiliiook. Ii éwahcheesh baa ala koottáahileesh kan díikukkussaak kan dáhkalatchessuuk. <sup>8</sup>Hinna íwahkooteesh Akbaatatdía kuk kussaak. Kuk ítchik ákahchiia dii dáasaasak baa ala koottáahileesh kaka kuss dii aachissáak dii aahiilák hiliachik. <sup>9</sup>Hilíashéeluk buh. “Iiwaaxuapúalioo kootáa kooshtakáateehtaa baaxawuá íhkashiiot datcheepaachíiluk.” huuk. Iwak baa al iháate dáhkalattuulak kala saskáat kal áxpíhkaalawak baa al iháate ihée dáhkalatchelohmaachik. <sup>10</sup>Akbaatatdía an díluuosh chichútduum bii chiweék. Heem baleiichiweéítcheesh písshe daléohmaachim éwahchekaashik. Heem eek ak dii baa hawátduuwiileetuush dii héeluan bilaxpáakasiitdahtaa Akbaatatdía kuk datchúshiihmaachim éwahchekaashik. <sup>11</sup>Deéla bik bii hilíashiiok. “Hileen bacheé al áaxxaapashkuhkuuash baa annawík.” bii hehkuuhtaa kootáa bii íáxxohchewiak ilúuak bii al ilíiwisuuu baatcháattuuk. Bakúpkaateen ii bíss baa daaskawáaush hinna bacheé ihch áaxxaapashkuhkuulak kóosh ko ii baachimmíwahchessaak bahkalátchessaak. Haak hinna Ischawúuan Dakkaasúua kal ala saawilikkúuash kuttátdaht kal ii baa ímmitaahileesh ii baa daaskawíikaasuuk.

<sup>12</sup>Hileen bacheéom ak dii baa hawátduuwiiliik ak dii ishditcheeshíosh “Al áaxxapashkuhkuuash baa annawík.” hiliatuulak ittákaa ihch áaxxapashkuhchessaa baatách xaxúa páshkuhkaak bitáaxiilak ko ítchiihmaachik.

<sup>13</sup>Bakúpkaateen Akbaatatdía dii dáasaasak heem Jews kooté is baleilíiaakaxpissuuash isaawiakséennakaassuulak an dílaachkissheesh alaáchiwissuulak hiliachim kal ammaa ii dii awáss daxtúuleetdak ko dii aaliíwiook. Heeht díhch íassiiialah. Díilaa hiliínnaak baa iháatdiassalah. Baaleettaa bach aláchissuum kalako ii bat baa íalahkaak bach kuxsakáalah. <sup>14</sup>Hinna íwahkootesh hileen baleilíiaakaxpissuua kala xaxúa bach aalaláalak hinna baleilíiaakaxpisse “An díhch aláchissheesh dii áaxxaa bilaxpáake kúh kootáakuuh.” heihmaachik.

<sup>15</sup>Iwak ii sheewée bat dískawiilaak bach an dalíiwisuuk. Koochéessaataahilalah. Koómnaassuulak al ii bat dáhkuxshiwialuulak annúuleetiihmaachik. Kalako ii ak baa kalátcheesh éetshii daláak díhchi baa haawátdaalohmaachik.

**Baleiláaxbaaxpee ala kootéesh awaáchimmiilush daachik.**

<sup>16</sup>Iwak kaka sheewáawiik. Baleiláaxbaaxpee an díileesh ko kuhtaa dáalah. Koótduulak daláammaatchaachissa alohmaachik. Haak íisko baatát dalásannialaakaasheesh kala kootássaaihmaachik. <sup>17</sup>Biixaxúa balee bíshko kukaa balee al iháatbishim hinna an balee ala kootéesh dak Baleiláaxbaaxpee dak bach iichúulaak bach is kootáauk. Hinna balasanníaliawuuash baa iháatbaawiawuum Baleiláaxbaaxpee kúh balee baa hiléessaawiak. <sup>18</sup>Heehtaa Baleiláaxbaaxpee ko daláwuulak baleilíiaakaxpisseesh díilussee kan baa hámneetam dii isaawiakséelassaaohmaachik.

<sup>19</sup>Bilaxpáake ala kootúuash kal ii élahchehtaa kala chii dii chichéhchewahchewiiluk. Ala kootúuash batshúoolassheen an baa dasshihtúua dak ammaa hilúua dak ítchissuuk. Bach kataalák bale aláxuushkawiiia baa kxawíihiluuu shíishiaahe deéla an bilaxpáakuua baa ala sáape ii ílaxuoo al ittáu sáapdak kalako chíilak kuttát dasshihtakaáuk. <sup>20</sup>Haak baa iháateet kuss chiwakáak baa dúshkuawiak íwahkootuum kalakoon kan bach is koochíiak bat bulúak baa ihée baa áau óolitak eewíak ii dúupiak daásbahtak íluttach ihchi



baa ilúuak ak báakaatdewioo ii baa baatcháatdiailuk. Haak ílaakkakaattaak íwahkoocheeluk. <sup>21</sup>Kootáa baa ihée baa aáu eewíak bilitchilappiiák baa isshiiák káaxuttaak baa baaláaxxataak batshúoolassheen ihée baa iháatdiaohmaachik. Heem ala kootúuash kala chii kan dii baachiwaáuk. Baa íwahkooteesh ak koochéesh Akbaatatdía is bilaxpáake ammaa an díakuuwiash kuk dútchissaaohmmachik.

<sup>22-23</sup>Heehaa Akbaatatdía Iláaxbaaxpeesh koóm bilaxpáakeesh an baa dasshihtúua dak al ihchi dúttuua dak ko kulussáauk. Bach íchissak daásittak bach áxp áaahkutchiik daasátchutak baa daásdeeak ittakaak bilaxpáaktaahiluum an bihchi bíawuuwishik. Ak cheéshdaak ihch íassiiak bilaxpáake iháatchessuuk. Bilaxpáake ala xatáau íwahkootuulak baleilíiaakaxpisseesh shóolahtaa kal ii chiláauleetak. <sup>24</sup>Bilaxpáakuum Christ Jesus ak kalátcheesh kal iíska an bilaxpáakuuash kulupíak baa al iháatdioosh isítchiiosh kal iwiátak kal íkaaishissuuk. <sup>25</sup>Baleiláaxbaaxpee baa áakaawatbilikkuuk. An balee bilaxpáaktaahileesh balee aahiiák balee iléek. Heem hinna balee bilaxpáakeesh kukkan Baleiláaxbaaxpee kalako bihchi hawasséewahkaak Akbaatatdía is díiannee ítchikaateesh ko ii kuhtaa beéwiilush daachik. <sup>26</sup>“Bik bii ittáak bik bii baatchaatéek.” baliatuulak ii bach awáxpilishtewahkaak baatách ii bassánmewiawuuk. Balee chikitcheelitúulak baliatuuk. Koochéessaalah. Bat daaskawíwahchessaawook. Haak kúh baa aáu awólichissaawiiilush daachik.

**Dii héluuan hawáteem baa chúuss  
deekaaséelak kuxsakuuáalah.**

**6** Bakúpkaateen akchiwakíiash aaláa dii héluuan hawátam baa iháatdialaatak dii héluuan akchiwakáaum Baleiláaxbaaxpee axúoo datcheepéesh kon íttaattaa innáak Akbaatatdía kuss aachissáalah. Heehaa díhch íasseekaasaalah. Aaláa ammaa kxawíihileesh díluh koótdaaloh. <sup>2</sup>Deéla dii héluuan hawáteem baa chúuss deekaasáaulak kuxsáalah. Christ ammaa dii díahkuua koók. <sup>3</sup>“Bik bii baatchaatéek.” baliatuulak baaleetdak báheelia bihchi kúawuuk. <sup>4-5</sup>Dii íkuxxachia Akbaatatdía an dii díahkuuash baakoon díalaak dáakahkiilush daachik. Hinna

íwahkootesh baa an díaluuash dak baa an dáasshihtuuash dak chilassihchikaásak annawíiaalah. Kalako ii Akbaatatdía baa an díaluuash isítchiiak daásitchim élahchelohmachik. Bilaxpáake hawéese ammaa an díoo ii díhchi baailíshessaak ammaa an díaluuash kuk baa íkuxxeewiassaak itchikaaséewiassaalah.

<sup>6</sup>Haak Akbaatatdía al ilíia ak ii dii baálilaaum baa daáu al ítcheesh aláxpak ii díalaaliilush daachik.

<sup>7</sup>Hileén éhchekaasaalah. Akbaatatdía kúalaawialuulak annúuleetak. Sáapdialuulak xaxúa éhchek. Bale al ilíia baaxpáauk. Hinna baapé baam sheelúulak hinna an dílaaush baapéem díiluss chishshíhmaachik. Díhch íassiaalah. Baam díalaalak kuk ko kala kooták. <sup>8</sup>Bilaxpáaksapeelahtaa an daasanníaliikaasheesh ammaa kxawíihileesh ko bassáahchelak ko is bacheeítchihchelak kalako ii shéem axúa xawáak daachík. Heehtaa Baleiláaxbaaxpee ko is bacheeítchihchelak kalako ii Akbaatatdía áxpalahko koochihtíhmaachik. <sup>9</sup>Bíilu baa ítchim díawuuash baheeléewessaa kannaa bihkúalassaawiiilush daachik. Koótbuulak ammaa an díawuua Akbaatatdía isítcheelak al íkuxxaahchewishim hiilák ammaa bilikkúuash baatcháachiimaachik. <sup>10</sup>Kal íwahkootak. Shóon ammuúwishdak balee áaxxee bilaxpáakeesh xaxúa díawaaitchiwaawakbook. Hileen Christ is baa al iichiweé ak iikukkóosh diawaaitchikaaséewaawakbook.

### Díhch íassiiak díhch áakhiiaalah.

<sup>11</sup>Ikaalah. Ammaa ala sheewáawiawee sheewáataahinmiawaam bíilaataahilia an baawalaáche isaawaáhik. <sup>12</sup>“Ischawúuan Dakkaasúua saawilikkuuák Akbaatatdía al íkee balee baatát tátchikaatdak hiliachik.” hileen bilaxpáake ii dii baálilaaughtaa dii áaxxaapashkuhchewiakaasak íwahkootuuk. Iwak ammaa an díoo ii asiitkaasshewiook. Ii kootúuash Jews isítchiiak baailíshekaasshessuulak hiliatuuk. Baa biipé íwak kuttáchik. <sup>13</sup>Díhch áaxxaapashkulahchewialuulak baleilíiaakaxpissuum Moses bilikkúuash kala xaxúa díalalohmaachik. Heehtaa dii ak páshkuhchewiataahileesh ílaxuoohtaa Moses ammaa íkuchkeesh iikukkutáahilissuuk. Hileen hawátuum dii

páshkuhchewioosh ii kootúua ii ilíiwaaiseewiook. <sup>14</sup>Heehtaa bik kan baa iháassee ii balíiwiawaassaak Ischawúuan Dakkaasúua saawakúk. Ammaa díawakoosh kala kuttát ii balíiwaaisaawaalak kala koók. Haak hilaakée ko baawatbakáleesh ko awákaak. Heem ak baa kalátcheleete baa al isáakaashihkuua bik bulusáak bahkulupíak. Ak baa kalátcheleete baa ala hámneetahkuua bik baa al isáakaashbahchek. <sup>15</sup>Heem Akbaatatdía al íkee bachéem áaxxaapashku xuh shóotdak kuk baa hámneetak. Baaleettaa Ischawúuan Dakkaasúua saawilikkúuash kalako ii balee baa hilaakkáatak. <sup>16</sup>Heem Akbaatatdía is díiannee baaxpéesh bilaxpáake ak kuhtaa déesh iixaxúa daásdeekuuk heelak baakoon kaáitcheeoh. Akian Akbaatatdía is bilaxpáake koók. Haak ákian Israel bilaxpáake koottáhile koók.

<sup>17</sup>Bii baailíshehkaakaaum kalako ii baxúash iilúattachik. Jesus is alóoshe koók. Jesus kon bii eé kal ii xíasseesh koók. Hinna íwahkooteesh kan díixaxua kan bii baailíshehchessaakaawakaalah.

#### **Paulsh Galatians kuss baalaácheesh ii háakeesh**

<sup>18</sup>Bakúpkaaten hilísh Baxxiilaatúuash Jesus Christ dii íchishikaasak dii daásdeekaashdakak dii kuksúulak ko ii bahchiwakáawalakuuk. Akbaatatdía kuss “Kootáhkaawilikkuuh. Ahóoh.” baik.